



Godina XII
Utorak, 14. listopada/oktobra 2008. godine

Broj/Broj
83

Godina XII
Utorak, 14. oktobra 2008. godine

Na osnovu člana 4. i 12. stav (1), tačka 10. Zakona o ministarstvima i drugim organima uprave Bosne i Hercegovine ("Službeni glasnik BiH", broj 5/03, 42/03, 26/04, 42/04 i 45/06), člana 16. Zakona o upravi ("Službeni glasnik BiH", broj 32/02), člana 120., 137. stav (3) i 161. stav (1) Zakona o kretanju i boravku stranaca i azilu ("Službeni glasnik BiH", broj 36/08), Ministarstvo za ljudska prava i izbjeglice Bosne i Hercegovine, u saradnji sa Ministarstvom civilnih poslova Bosne i Hercegovine i Ministarstvom bezbjednosti Bosne i Hercegovine, donosi

PRAVILNIK

O NAČINU OSTVARIVANJA PRAVA NA RAD LICA KOJIMA JE PRIZNATA MEĐUNARODNA ZAŠTITA U BOSNI I HERCEGOVINI

I. OPŠTE ODREDBE

Član 1.

(Predmet Pravilnika)

Ovim Pravilnikom uređuje se način provođenja Zakona o kretanju i boravku stranaca i azilu (u daljnjem tekstu: Zakon), nadležni organi, osnovni principi i posebni uslovi u pogledu osiguranja prava na rad licima kojima je priznata međunarodna zaštita u Bosni i Hercegovini (u daljnjem tekstu: BiH).

Član 2.

(Nadležni organi za provođenje ovog Pravilnika)

Nadležni organi za provođenje ovog Pravilnika su: Ministarstvo za ljudska prava i izbjeglice BiH (u daljnjem tekstu: MLJPI), Ministarstvo bezbjednosti BiH (u daljnjem tekstu: MB), Ministarstvo civilnih poslova BiH (u daljnjem tekstu: MCP), nadležna entitetska ministarstva, nadležni odjeli Brčko Distrikta BiH, entitetski zavodi za zapošljavanje, Zavod za zapošljavanje Brčko Distrikta BiH, kantonalne službe za zapošljavanje u Federaciji BiH (u daljnjem tekstu: FBiH), entitetski zavodi penzionog/mirovinskog i invalidskog osiguranja i opštinske službe nadležne za poslove rada.

Član 3.

(Lica koja ostvaruju pravo na rad)

(1) Lica koja ostvaruju pravo na rad pod istim uslovima kao i državljani BiH, a u skladu sa važećim zakonima u BiH i međunarodnim sporazumima u ovoj oblasti su:

a) Lica kojima je priznat izbjeglički status pravosnažnom odlukom MB, na osnovu člana 116. tačka a) Zakona,

b) Lica kojima je priznat status supsidijarne zaštite pravosnažnom odlukom MB u skladu sa članom 116. tačka b) Zakona,

c) Lica kojima je priznat izbjeglički status u skladu sa članom 156. Zakona.

(2) U slučaju spajanja porodice na osnovu člana 120. stav (3) Zakona, članovi porodice lica iz stava (1) tačka a) i c) ovog člana uživaju ista prava kao i lica iz člana 116. tačka a) Zakona, u pogledu ostvarivanja prava na rad.

Član 4.

(Izuzetak od pravila)

Lica iz člana 3. ovog Pravilnika ne mogu da zasnivaju radni odnos u izvršnim, sudskim i zakonodavnim organima, kao i institucijama gdje se eksplicitno zahtijeva posjedovanje državljanstva BiH kao uslov za zasnivanje radnog odnosa.

Član 5.

(Identifikacioni dokumenti)

(1) Lica iz člana 3. stav (1) tačka a) i c) ovog Pravilnika dokazuju svoj identitet i status važećim izbjegličkim kartonom,

(2) Lica kojima je priznat status supsidijarne zaštite dokazuju svoj identitet i status validnim identifikacionim dokumentom izdatim u skladu sa članom 121. Zakona.

Član 6.

(Zabrana diskriminacije i prisilnog rada)

Prilikom ostvarivanja prava iz radnog odnosa zabranjuju se svi oblici diskriminacije, prisilnog i dužničkog rada, kao i iskorištavanje radnika.

II. PRISTUP PRAVU NA ZAPOŠLJAVANJE

Član 7.

(Pristup instituciji za zapošljavanje)

(1) Lica iz člana 3. ovog Pravilnika imaju pravo prijave na evidenciju nezaposlenih lica u nadležnoj instituciji za zapošljavanje pod istim uslovima kao i državljani BiH.

(2) Nadležna institucija za zapošljavanje određuje se prema mjestu boravka lica iz člana 3. ovog Pravilnika.

(3) Sticanjem statusa nezaposlenog lica, lica iz člana 3. ovog Pravilnika imaju ista prava i obaveze kao i državljani BiH.

Član 8.

(Dokumentacija za prijavu nadležnoj instituciji za zapošljavanje)

Prilikom prijave nadležnoj instituciji za zapošljavanje, lica iz člana 3. ovog Pravilnika dužne su da dostave na uvid sljedeće dokumente:

- a) identifikacioni dokument naveden u članu 5. ovog Pravilnika,
- b) prijavu mjesta boravka,
- c) radnu knjižicu,
- d) dokaz o stepenu stručnog obrazovanja, odnosno stručne osposobljenosti (ukoliko nije upisan u radnu knjižicu),
- e) potpisanu izjavu u skladu sa važećim propisima u BiH.

Član 9.

(Radna knjižica)

- (1) Radna knjižica za lica iz člana 3. ovog Pravilnika izdaje se prema Pravilniku o izdavanju radne knjižice na isti način kao i državljanima BiH.
- (2) Prilikom podnošenja zahtjeva za izdavanje radne knjižice, kao identifikacioni dokument koristi se identifikacioni dokument naveden u članu 5. ovog Pravilnika.

Član 10.

(Priznavanje diploma)

- (1) Lica iz člana 3. ovog Pravilnika, prilikom prijave nadležnoj instituciji za zapošljavanje, dužne su da imaju nostrifikovane diplome kao i državljani BiH.
- (2) Priznavanje diploma o stečenom znanju u zemlji porijekla ili zemlji prethodnog boravka lica iz člana 3. ovog Pravilnika vrši se pod istim uslovima kao i za državljane BiH, u skladu sa važećim propisima u BiH.

Član 11.

(Podaci o radnom stažu)

Licima iz člana 3. ovog Pravilnika podatke o radnom stažu i uplaćenom penzionom stažu, ostvarenom u BiH, a u nedostatku radne knjižice, izdaje nadležna institucija penzionog/mirovinskog i invalidskog osiguranja.

Član 12.

(Zapošljavanje bez posredovanja nadležne institucije za zapošljavanje)

Lica iz člana 3. ovog Pravilnika mogu slobodno i bez posredovanja nadležnih institucija da traže posao, da zaključuju ugovore iz radnog odnosa i da se samozapošljavaju, u skladu sa važećim propisima iz oblasti rada i zapošljavanja.

III. PRISTUP PRAVU NA RAD

Član 13.

(Identifikacioni dokumenti za zaključivanje ugovora o radu)

- (1) Identifikacioni dokumenti navedeni u članu 5. ovog Pravilnika koriste se i prilikom zaključivanja ugovora o radu.
- (2) Prilikom zaključivanja ugovora o radu mogu da se koriste samo podaci navedeni u identifikacionim dokumentima iz člana 5. ovog Pravilnika.
- (3) Identifikacioni dokumenti navedeni u članu 5. ovog Pravilnika takođe se koriste prilikom uplate doprinosa u nadležne fondove koji proizilaze iz radnog odnosa.

Član 14.

(Izuzeće od obaveze posjedovanja radne dozvole)

Za zasnivanje radnog odnosa ili samozapošljavanje lica iz člana 3. ovog Pravilnika radna dozvola nije potrebna.

Član 15.

(Prava iz radnog odnosa)

Lica iz člana 3. ovog Pravilnika ostvaruju prava iz radnog odnosa u smislu: plate, zaštite na radu, uslova rada, naknade za rad, radnog vremena, angažmana za prekovremeni rad, plaćenih odmora, minimalne starosti kod zapošljavanja, pripravničkog staža, prava na obuku i prekvalifikaciju, zaštite žena i materinstva, zaštite omladine i ostalih prava koja proizilaze iz radnog odnosa pod istim uslovima kao i državljani BiH.

Član 16.

(Postupanje MLJPI)

MLJPI prestaje plaćati doprinose za zdravstveno osiguranje licima iz člana 3. ovog Pravilnika danom stupanja u radni odnos bez obzira da li je lice zaposleno ili samozaposleno.

Član 17.

(Obaveze zaposlenika)

- (1) Lica iz člana 3. ovog Pravilnika dužne su odmah, a najkasnije u roku od 15 dana po sklapanju ugovora iz radnog odnosa, da obavijeste MLJPI o sklapanju ugovora.
- (2) Uz pismeno obavještenje, predato na protokol MLJPI ili poslano preporučenom poštom, lica iz člana 3. ovog Pravilnika obavezno prilažu i kopiju ugovora o radu.
- (3) Ukoliko je lice iz člana 3. ovog Pravilnika bilo na spisku nezaposlenih lica, prijavljuje zasnivanje radnog odnosa i nadležnoj instituciji za zapošljavanje.

Član 18.

(Prestanak radnog odnosa)

U slučaju prestanka radnog odnosa, lica iz člana 3. ovog Pravilnika ostvaruju prava po osnovu nezaposlenosti pod istim uslovima kao i državljani BiH.

Član 19.

(Slobodne profesije)

(1) Pri obavljanju slobodnih profesija, lica iz člana 3. ovog Pravilnika imaju ista ograničenja i ispunjavaju iste uslove kao i državljani BiH.

(2) Slobodne profesije su one profesije koje se obavljaju na osnovu relevantnih profesionalnih kvalifikacija, u ličnom i profesionalnom kapacitetu od strane onih koji pružaju intelektualne i konceptualne usluge u interesu korisnika i javnosti.

Član 20.

(Udruživanje u sindikate)

Zaposlena lica iz člana 3. ovog Pravilnika imaju pravo na osnivanje sindikata i učlanjivanje u sindikat radi zaštite svojih interesa u skladu sa važećim propisima u BiH.

IV. PRELAZNE I ZAVRŠNE ODREDBE

Član 21.

(Zaštita podataka)

(1) Na podatke koji se odnose na lica iz člana 3. ovog Pravilnika primjenjuju se propisi o zaštiti ličnih podataka koji se odnose i na državljane BiH.

(2) U odnosu na zemlju porijekla, sve informacije i podaci o licima iz člana 3. ovog Pravilnika smatraju se povjerljivim i mogu da budu dostavljeni zemlji porijekla samo nakon što se prethodno pribavi mišljenje MLJPI i pismena saglasnost lica, ili njenog zakonskog zastupnika, na koje se taj podatak odnosi.

Član 22.

(Vođenje službene evidencije)

(1) MLJPI vodi službenu evidenciju o licima koja ostvaruju pravo na rad, u skladu sa ovim Pravilnikom.

(2) MLJPI, na osnovu člana 162. Zakona o upravnom postupku BiH, izdaje potvrde o činjenicama o kojima ovo Ministarstvo vodi službenu evidenciju.

Član 23.

(Povoljniji tretman)

Entiteti, Brčko Distrikt BiH i kantoni u FBiH mogu da pruže povoljniji tretman licima iz člana 3. ovog Pravilnika prilikom ostvarivanja prava na rad, a koji imaju boravište na njihovoj teritoriji, nezavisno od ovog Pravilnika, ukoliko se povoljniji tretman pruža i državljanima BiH.

Član 24.

(Tumačenje Pravilnika)

Za tumačenje odredbi ovog Pravilnika nadležno je MLJPI.

Član 25.

(Stupanje na snagu)

Ovaj Pravilnik stupa na snagu osmog (8.) dana od dana objavljivanja u "Službenom glasniku BiH".

Broj 01-02-3447/08
12. septembra 2008. godine
Sarajevo

Ministar
dr **Safet Halilović**, s. r.